

80 pa 85 famia ta cay bao di Centro di Famia di Criansa

ORANJESTAD(AAN): Nathalie Tromp, trahado social di Centro Famia di Criansa Arubano, a splica cu tin casi 80 pa 85 famia ta cay bao di Centro. Ta papiando aki di famianan cu tin custodia di mucha. Ta papiando di famianan cu e mucha ta bibando cerca nan, pero nan no tin custodia di e mucha, esta ta wardando si e situacion di e mayor ta mehora. Tambe tin famianan di weekend, cu ta yudando awor aki.

Tin necesidad pa famia y personanan den comunidad cu kier bira un famia di criansa. Tin seis tipo di famia di criansa, famia di weekend y famia pa temporada cortico no mas cu 2 aña y tambe famia pa un temporada mas largo. Esey kiermen cu no sa si e mucha lo bay bek cerca e mayor. Ta busca tambe famianan cu ta dispuesto pa yuda muchanan cu un limitacion mental of fisico y tambe ta busca famia cu ta yuda den



temporada di crisis. Mester pensa cu ora cu ta pidi pa temporada di crisis, ta yama famianan inesperadamente pasobra e muchanan mester un caminda di keda. El a wordo saca for di cas pasobra e situacion na cas no ta bon y tin biaha tin internadonan no tin luga. Esey ta nifica cu e mucha tin mester di un caminda di bay, sino e tin cu keda den e situacion e ora ey na cas, cu no ta bon p'e.

Esaki ta un situacion cu ta keda na Aruba. Tin mayornan eyfo cu nan situacion no ta bon. Nan no sa con pa resolve e situacion of no ta traha pa resolve e situacion. Esey kiermen cu cada bes ta keda

haya muchanan cu tin mester un caminda di bay te ora cu e mayornan aki haya e ayudo of nan busca e ayudo cu nan tin mester pa asina eynan nan traha riba nan situacion. Pero e muchanan aki no por keda warda riba nan mayor.

Ya caba den e situacion cu nan tabata na cas, no tabata bon pa nan. E no a yuda nan. Bo ta haya muchanan cu na scol no ta bay bon of muchanan cu emocionalmente, mentalmente a pasa den un trauma y nan tin mester e ora eynan di un famia cu ta yuda nan build up. Internadonan ta bon pa un momento. E ta manera un tussenstation cu ta yuda e muchanan, duna nan

un momento di tranquilidad, pa despues e ora eynan nan por haya e cariño, e cuidio di un famia. Nos tur como ser humano kier tin un conexio cu otro hende. Kier tin un contacto, kier tin cariño, kier tin amor, pa asina eynan si-gui desaroya.

E muchanan aki juist door di locual cu nan a pasa aden na cas, nan tin mester di e cariño eynan di un famia. Ta pesey ta boga den comunidad pa asina eynan bin na e centro, bin busca informacion. Ta tende di famianan cu ta acerca cu tin hopi informacion cu nan ta haya eyfo, cu no ta cuadra precisamente cu e realidad. Pesey ta pidi pa tur hende cu ta interesa, djis yama, no tene berguensa, no tene miedo.

No ta existi cu si yama ta bira un famia di criansa, pero pa e informacion cu haya por ta esey kiermen ora cu e famia ta cla prepara pa bira uno di criansa. Ta keda cu mester di famianan di criansa, pasobra una bes cu uno of mas mucha haya un famia di criansa, tin otro para su tras cu tambe tin mester.

Telefonnandi DIARIO

Tel: 582 6747

Fax: 582 8551